

ICA OME TAJCUILOLAMATZIN TEN QUINIJCUILOHUILIJ IN TATITANIL SAN JUAN PARA NOCHI IN TANELTOCANI DE NOCHI SENMANAHUAC

In melahuac Tajtoltzin huan ne tetasojtalis

¹Nejua ya ni Juan
nitiopanhuehuentzin huan
nitayecanque den taneltocani. Huan
nimitzijcuilohuilía tejuatzin den
tinocnitzin sihuat, ten tejuatzin titajital
de Dios, ijcón queme niquiniycuilohuilía
moconeahuan. Huan nejuatzin
namechyectasojta nochi namejuan.
Huan amo sayó nejua namechyectasojta.
Ta, nochi neques ten quixmatocque ya
in melahuac Tajtoltzin de Dios, yejuan
nojonques no namechyectasojtaj.

²Huan no tamechyectasojtaj porín
ticpíaj ya tech toyolijtic in yec melau
Tajtoltzin. Huan nijín Tajtoltzin
yejua ne tohuan yetos sen nachipa.

³Huan Totajtzin Dios huan Totecotzin
Jesucristo, Yejuatzin Iconetzin Dios,
ma Yejuatzin namechtiochiuto huan
ma namechtayocoli ne teicnelilis
huan ne yolsehuilis, ijcón queme
namejuan nanmelaucanemij huan
nantetasojtatinemij.

⁴Huan semi niyolpaqui porín
nejua niquinajsic sequi de

moconeahuan taneltocani. Huan
yejuan yec chipaucanemij, ijcón
queme techmachtía in melahuac
Tajtoltzin, huan ijcón queme Dios
technahuatilij ma ticchiutiayan.

⁵Huan axcan, nocnitzin sihuatzin, tel
senca nimitzontatautía de que ma
timosepantasojtacan se huan ocsé.
Huan nochi nijín ten nimitzijcuilohuilía
amo se yancuic tanahuatil. Ta, ipa
ne tanahuatil ten nanquiapiayaj ya
desde ne cuac yequinica namejuan
nanquineltocacque. ⁶Huan ne
tetasojtalis de Dios yejua nijín: Ma
tictacamatican ica ne tanahuatil de
Dios. Huan in tanahuatil de Dios
yejua nijín: Ma xinentinemican ica ne
tetasojtalis ijcón queme ipa achtopa
nanquiacque.

In tacajcayahuani

⁷Huan miacque tacajcayahuani
tactalpanojtinemij axcan nican talticpac.
Huan nojonques quiyectenehuaj que
in Jesucristo amo monacayotico
nican talticpac queme yec melau se
tagat. Huan nochi neques ten ijcón
tamachtijtinemij, yejuan nojonques

tacajcayahuani san huan taixnamiquini de Cristo. ⁸Huan namejuan cuali ximotachilican de nojón tacajcayahuani para ma amo ximopolohuilican in taquilot den namotequiu ihuan in taneltocani. Ta, nicnequi ma xicselican ne tetayocolil den cuali ajsitoc.

⁹Huan nochi neques ten tamachtijtinemij huan quippanahuíaj in tamachtilis de Cristo, yejuan nojonques amo quichiutinemij in tamachtilis ten Cristo technextilía, huan yejuan amo no quipíaj tech ninyolijtic in chicahualis de to Dios. Huan nochi neques ten quitacamatinemij ne tamachtilis ten Cristo technextilía, yejuan nojonques quipíaj tech ninyolijtic in Totajtzin Dios huan no Iconetzin Dios. ¹⁰Huan como acsame namechcalpanoquij huan amo cualcuij in tamachtilis de Cristo, ijcuacón

namejuan amo xiquinselican tech namocalijtic campa nanmosentilíaj para nanquimohuistilisque Dios, huan nión no xiquintajpalocan. ¹¹Porín ne ten quintajpaloaj in tacajcayahuani, yejua ne ninuan poutoc ya in amocuali chihualisme ten ne tacajcayahuani cualcuij.

Tajtolme tenica tamis nijín tajcuilolamatzin

¹²Míac tensá nicpía oc para namechilis, pero amo nicnequi nicchihuas sayó ica amat huan ica tinta. Pues nejua nicnequi niyás namechitatu huan namechsepannojnnotzatiu para que ijcón in topaquilis ma moyecmajxiti. ¹³Mitztajpaloaj iconehuan de mosihuaicniu, yejua no taijital de Dios. Ma ijcón mochihua. Amén.